

## 'Jangan simpan jadi hiasan'



Jayamuddin Ahmad menerima bantuan mesin pengadun tepung dari Ganabathirau sempena Program Bantuan Peralatan Blueprint Pembersihan Kemiskinan Negeri Selangor 2016.

SEPANG - Penerima bantuan peralatan membasmi kemiskinan dinasihatkan tidak mensia-siakan kemudahan yang diberikan.

Exco Kemiskinan, Kerajaan Prihatin dan Pekerja Ladang, V Ganabathirau berkata, bantuan itu perlu digunakan sebaiknya bagi membantu meningkatkan ekonomi keluarga.

"Kerajaan memperuntukkan RM2 juta untuk menyalurkan bantuan kepada mereka yang layak. Walaupun peralatan ni percuma, penerima patut memanfaatkan sebaik mungkin untuk menjana pendapatan.

"Jangan simpan saja jadi hiasan, tunggu raya baru nak guna, memang rugi," katanya pada majlis penyampaian Bantuan Peralatan Blueprint Pembersihan Kemiskinan Negeri Selangor 2016 daerah Sepang di Pejabat Tanah dan Daerah Sepang, di sini.

Hadir sama, Adun Tanjung Sepat, Ir Mohd Haslin Hasan; Adun Sungai Pelek, Lai Nyuk Lan dan Penyelaras Dun Dengkil, Borhan Aman Shah.

Dalam pada itu, Ganabathirau berkata, sebanyak 57 permohonan diterima dari daerah Sepang tahun ini dan

hanya 50 diluluskan.

Menurutnya, semua permohonan itu diteliti dan bagi yang tidak lulus mungkin disebabkan tidak menepati syarat ditetapkan.

"Bantuan ini jadi pilihan ramai penduduk, jadi penerima yang berjaya seharusnya gunakan peralatan diberikan sebaik mungkin untuk meningkatkan taraf hidup keluarga.

"Kalau main-main, tak perlu mohon sebab masih ramai lagi individu yang perlukan bantuan ini untuk mengubah masa depan keluarga," katanya.

## Bukit Jugra jadi pilihan pendaki

JUGRA - Bukit Jugra terus popular apabila terus menjadi pilihan sebagai lokasi pendakian dan rekreasi.

Pengerusi Program Jugra Fun Run 2016, Sajajah Abd Razak berkata, pemilihan Bukit Jugra sebagai lokasi penganjuran memberi peluang kepada ahlinya untuk merasai sendiri pengalaman mendaki.

"Kebiasaannya Fun Run diadakan di laluan mendarat dan kali ini tiba masa untuk kita buat kelainan dengan menjadikan Bukit Jugra sebagai lokasi.

"Paling seronok bila kita dapat peserta termuda seawal sembilan tahun dan tertua mencecah 63 tahun," katanya kepada *Sinar Harian* pada program anjuran Jelita One Fitness, Pejabat Belia dan Sukan Daerah Kuala Langat dan Fit Malaysia.

Turut serta, Guru Besar Sekolah

Kebangsaan Methodist, Ahmad Rosidi Md Sirat.

Dalam pada itu, Sajajah berkata, pemilihan Bukit Jugra itu juga sebagai promosi lokasi pelancongan.

"Kita bukan saja beriadah untuk mewujudkan semangat bersatu, malah menyemai semangat cintakan alam dalam kalangan peserta," katanya.

Sementara itu, Ahmad Rosidi berkata, aktiviti pendakian ini perlu diteruskan pada masa depan untuk melahirkan generasi muda yang bersemangat kental.

"Bukan mudah untuk mendaki, tapi masing-masing menunjukkan semangat. Mereka bukan saja aktif bersukan malah dapat mempopularkan kawasan sendiri.

"Sebagai guru, saya mahu mereka menghayati anugerah alam di sini," katanya.



Sebahagian pendaki yang terlibat dalam Jugra Fun Run.

# Bantu 'ceriakan' 45 perhentian bas

MDKL ambil inisiatif gotong-royong bersihkan persekitaran secara berterusan

TELOK PANGLIMA GARANG - Majlis Daerah Kuala Langat (MDKL) akan memastikan perhentian bas di sekitar daerah ini diberi perhatian untuk keselesaan penggunaannya.

Ahli Majlis Zon 3, K Rajan berkata, terdapat beberapa perhentian bas di kawasan seliaannya menjadi mangsa vandalisme, selain persekitarannya kotor.

"Ada empat perhentian bas di kawasan ini, persekitarannya bukan sahaja terjejas dengan vandalisme, malah jadi kotor sebab orang ramai tak jaga kebersihannya.

"Banyak longgokan sampah haram di kebanyakan perhentian bas di Telok Panglima Garang dan saya sendiri pernah nampak warga asing, kumpulan pelajar yang buang sampah di kawasan itu tanpa rasa bersalah. Bukan tu saja, banyak iklan pinjaman wang ditampal hingga mencacat-



RAJAN

kan pemandangan," katanya kepada *Sinar Harian* pada program Gotong-royong Keceriaan Perhentian Bas di kawasan MDKL, semalam.

Empat perhentian bas dibersihkan dalam program itu yang melibatkan lebih 40 kakitangan MDKL.

Program yang diselenggarakan Unit Pengurusan Sisa Pepejal dan Pembersihan Awam (UPSPPA) diketuai Norain Mohamed itu akan diteruskan di beberapa kawasan lain,



Rajan mengecat tiang perhentian bas sebagai gimik perasmian gotong-royong berkenaan.

Oktober ini.

Rajan berkata, UPSPPA akan diarahkan membuat pemantauan berterusan bagi memastikan perhentian bas berkenaan selesai untuk digunakan orang ramai.

"Keceriaan dan keselesaan di sesebuah kawasan memang susah untuk dikekalkan jika tak ada kerjasama masyarakat.

"Memang kesal bila tengok

harta awam seperti perhentian bas ini tidak dijaga sebaik mungkin, bila jadi macam ni, pengguna sendiri yang tak selesa," katanya.

Menurutnya, pihaknya juga akan mengambil inisiatif menghubungi syarikat pinjaman wang yang menampalkan iklan mereka di perhentian bas untuk memastikan ia tidak berulang.

"Kita bimbang orang awam, terutama pelajar terlibat dengan pinjaman wang berkenaan yang mungkin akan memberikan masalah pada masa depan.

"Kita akan minta mereka supaya tidak tampilkan iklan mereka di sini, habis rosak dinding, tiang perhentian bas. Kita akan beri tempoh sebulan, jika tidak tindakan un-

dang-undang akan dikenakan," katanya.

Sementara itu, Norain berkata, terdapat 45 perhentian bas terlibat dalam program berkenaan yang akan diadakan berterusan bagi memastikan keselesaan itu ceria dan selesa digunakan.

Menurutnya, usaha itu secara tidak langsung menangkis tanggapan awam mengenai tahap keselesaan kemudahan awam berkenaan.

"Tinjauan mendapati, perhentian bas dicemari dengan puntung rokok dan sisa makanan selain peniaga membuang sampah di kawasan berkenaan.

"Vandalisme terhadap harta benda awam sepatutnya tidak berlaku jika setiap anggota masyarakat prihatin. Malah, sampah juga perlu diurus dengan baik memandangkan terdapat tong sampah disediakan di tempat awam dan kawasan perniagaan," katanya.